



**Environmental
Justice Fund**
BY ACTIVISTS • FOR ACTIVISTS

Tsebišo ya go dira dikgopelo: February 2024

Mabapi le EJF

Sekhwama sa Toka ya Tikologo [Environmental Justice Fund] (EJF) ke mokgatlo wo o eteletšwego pele ke balwelatokologo wo o šomago go matlafatša mokgatlo wa toka ya tikologo ka Afrika Borwa ka go aba thekgo ya ditšhelete, go matlafatša bokgoni le go dira dikgokagano go mekgatlo le dikgokagano tše di theilwego setšhabeng.

Bao ba thekgwago ke EJF

Gore o tle o kgone go hwetša thekgo ya EJF, o swanetše:

1. O be mokgatlo goba kgokagano (e sego motho a nnoši) wo o theilwego go, le go ba karolo ya, setšhaba seo o se hlanelago;
2. Go šoma ka toka ya tikologo;
3. Go ba mo Afrika Borwa.

Mabapi le tshwanelego ya mathomo ya tšeo di lokeleditšwego ka godimo, hle ela hloko gore EJF ga e amogele dikgopelo go tšwa go di-NGO tšeo di hlomilwego. Se ke ka lebaka la gore EJF e hlomilwe ka nepo go rarolla bothata bja gore bontši bja ditšhelete ka tlwaelo bo ya go di-NGO tšeo di hlomilwego, mola mekgatlo ye e theilwego setšhabeng (di-CBO) e thatafalelwa ke go hwetša thušo ya ditšhelete thwii. Ke ka lebaka leo re lebišitšego tlhokomelo *kudu* go di-CBO. Go na le di-NGO tše dintši tšeo di dirago mošomo o bohlokwa wa toka ya tikologo ka Afrika Borwa, eupša ga di swanelege go hwetša thekgo ya EJF ka ge go na le thego ya ditšhelete e nngwe yeo di ka bago di swanelega go e hwetša. Gape ga re amogele dikgopelo go tšwa go dikhamphani tša poraefete le ditheo tše dingwe tša go dira poelo, goba go tšwa go ditheo tša mmušo (go swana le bommasepala).

EJF e thekga di-CBO tšeo di hlomilwego le tše mpsha. Ga go hlokgale gore o ngwadišwe semmušo gore o tle o swanelege go hwetša thušo go tšwa go rena.

Seo EJF e se thekgago

Re thekga tshepetšo ya toka ya tikologo. Re lebelela ka mokgwa o nabilego seo se bopago toka ya tikologo, eupša kakanyo ya gago e swanetše go dira kgokagano magareng ga mediro yeo o rerago go e dira le toka ya tikologo. Ka mohlala, kakanyo ya go aba diphuthelwana tša dijo go kgonthiša tšhireletšo ya dijo e ka no se swanelege, eupša kakanyo ya go hloma serapa sa dijo sa setšhaba le go hlahla maloko a setšhaba ka ga temo ya manyoro le melao ya temothuo ya go ya go ile, e ka swanelega. Taba ya bohlokwa ke go hlalosa kgokagano magareng ga protšeke/lesolo ya gago le toka ya tikologo.

EJF e ka thekga mošomo ya mabapi le, gare ga dilo tše dingwe: Toka ya tlelaemete le Phetogo ya Toka; Tšhilafalo ya Moya; Meepo; Taolo ya dijo; Meetse; Matlakala; Boiketlo bja basadi bja tikologo; Boiketlo bja Tikologo; Ditokelo tša Naga; Tšwetšopele ya tsebo ya setlogo; Mekgwa ya go iphediša e swarelelago; Maphelo a tikologo; Phihlelelo ya tshedimošo ya tikologo; le go tšea karolo ga Setšhaba go direng diphetho mabapi le



methopo ya tlhago. Le ga se lelokelelo le le rumilwego, gomme re tla ela hloko dikakanyo tša dilo tše sa boelwago mo ge e ba di sa dutše di wela ka gare ga toka ya tikologo.

Mešomo yeo EJJ e ka e thekgago e akaretša:

- Tiragalo e itšego (bjalo ka boipelaetšo, kopano goba thuto-tlhahlo);
- Go rulaganya, masolo le mošomo wa boemedi;
- Nyakišišo e etilwego pele ke setšhaba;
- Dikgopelo ka mekgatlo yeo e theilwego setšhabeng;
- Maanotshepetšo a thuto ya tikologo a setšhaba; le
- Maanotshepetšo a go matlafatšago mokgatlo.

Kamoo thekgo ya EJJ e šomago ka gona

Re fa thušo ya tšhelete ya ngwaga o tee ya R50 000 – R100 000. Gape re fana ka thekgo go tlaleletša thekgo ya ditšhelete ka mokgwa wa go maatlafatša bokgoni le thekgo ya kgokagano. Ge kgopelo ya gago e atlega, re tla ahlaahla se le wena ka botlalo.

Kamoo o ka dirago kgopelo

Go na le ditsela tše pedi tšeo o ka dirago kgopelo ka tšona:

1. Tlatša foromo ya kgopelo mo websaeteng ya rena go <https://ejfunds.org.za/apply-for-support/>.
2. Taonelouta foromo ye e hwetšagalago go <https://ejfunds.org.za/apply-for-support/> gomme o romele foromo e tladišwego go proposals@ejfunds.org.za. Ge seo se sa kgonege, o ka romela le diswantšho tša WhatsApp tša foromo e tladišwego go 0782910014, le ge re kgothaletša gore o romele foromo ka imeile ge eba o ka kgona.

O ka dira kgopelo ka polelo efe goba efe ya semmušo ya Afrika Borwa.

Letšatšikgwedi la mafelelo la dikgopelo ke **1 March 2024**. Hle ela hloko gore ga go dikgopelo tšeo di šilwego ke nako tšeo di tlogo go amogelwa.

Yo a amogelago kgopelo ya gago

Komiti ya Dithušo tša EJJ e bala dikgopelo ka moka gomme ya dira diphetho mabapi le gore ke mang yo a hwetšago thekgo. Komiti ya Dithušo e bopša ke balwelatokologo bao ba nago le maitemogelo lefapheng la toka ya tikologo. O ka bala tše dintši ka bona mo go <https://ejfunds.org.za/the-team/>.

Seo re se lebelelago kgopelong

- Kamoo kgopelo ya mediro ya mokgatlo wa gago e tla tšwetšago pele toka ya tikologo le go hola setšhaba seo o lego karolo ya sona goba o se hlankelago.
- Kamoo kgopelo e naganišitšwego gabotse ka gona – kgopelo ya gago e na le kgonagalo ya go atlega ge mediro ya gago ye e šišintšwego e hlalošitšwe gabotse (go e na le go lokeletšwa ka tsela ye e sa kwagalego) le ge go na le kgokagano ye e kwagalago magareng ga mediro yeo o nyakago go e dira le maikemišetšo ao o nyakago go a fihlelela.
- Gape re nyaka go bona gore o naganišitše gabotse ka tekanyetšo ya ditšhelete – go na le kgonagalo ya gore kgopelo ya gago e ka atlega ge seo se lego ka tekanyetšong ya ditšheete se amana ka tsela ya maleba le mediro yeo o šišinnyago go e dira, le ge e le gore o dirile mošomo wa gago wa gae mabapi le gore dilo di bitša bokae.



- Maemo a mokgatlo le maikarabelo a temokrasi ao a lego gona mokgatlong wa gago - mokgatlo wa gago o rulagantšwe bjang, o dira diphetho bjang, le gore o begela bjang setšhaba?
- EIJ ke mokgatlo wa basadi. Se se ra gore re kgetha go thekga mekgatlo yeo e eteletšwego pele ke basadi, le/goba mekgatlo yeo mananeo a yona a bontšhago go lemoga ditsela tše di kgethegilego tše basadi ba angwago ke go hloka toka ga tikologo le ye e nyakago go hola basadi ka mediro le mananeo a yona. Re šomiša mokgwa wo o swanago le ka bafsa.
- Gape re kgahlegela go tseba ge eba o šomile le mekgatlo e mengwe mo nakong e e fetilego (le gore ge e ba go bjalo, seo bašomišani le wena ba se bolelago ka wena) le ge eba o rerile go šomišana go protšeke/tiragalo/lesolo tše di šišintšwego.

Gape re ela hloko dintlha tše dingwe tše mmalwa tše di amanago le dikgopelo tše re di amogelago di le bjalo ka tša sehlopha. Se ke gore:

- EIJ e nyakago go thekga mekgatlo e hlomilwego e kopanego le e mefsa. Se ke ka lebaka la gore re dumela gore go aga mokgatlo wa toka ya tikologo go akaretša go matlafatša seo se šetšego se le gona, le go thekga mekgatlo e meswa go tsenela lekala le la bolwelatokologo.
- EIJ e rata go thekga mekgatlo yeo e šomago ka ditaba tše di fapafapanego tša toka ya tikologo, go e na le go tsepamiša kgopolo lefelong le tee fela go swana le meepo.
- Ge Komiti ya Dithušo e sekaseka dikgopelo ka moka, ba lebelela gape gore baabi ba dithušo ba EIJ ba lebelega bjang ka kakaretšo. Se ke gobane re ikgafile go netefatša gore re leka go thekga ka botlalo mekgatlo go ralala le naga, go akaretšwa le mafelong a kgole ao gantši a hlokomologwago. Ka nako e nngwe re ka hlahlwa ke taba ya gore mathata a tikologo a mpe kudu dikarolong tše itšego tša naga, eupša re leka ka maatla go netefatša gore baabi ba rena ba dithušo ba laetša go fapana ga mafelo a Afrika Borwa. Se se ka bolela gore re swanetše go gana dikgopelo tše dibotse ge e le gore go bile le dikgopelo tše dintši tše dibotse go tšwa profenseng e tee, e le go fa sebaka mokgatlo wo o tšwago profenseng e nngwe, gore re kgonthišetše boemedi bja profense.
- Re ka fana ka palo e lekanyeditšwego feela ya dithušo. Se se bakwa ke gore methopo ya rena ya ditšhelete e lekanyeditšwe. Gape ke ka lebaka la gore re dumela tabeng ya go fana ka thekgo e fetago feela tšhelete, ka gona ge re ikgafa go thekga mokgatlo, re nyaka go netefatša gore re ka kgona go phethagatša boitlamo bjoo ka tshwanelo.

Moo o ka hwetšago tshedimošo e nngwe

Bakeng sa tshedimošo e nngwe, hle bala Tlhako ya Kabo ya Dithušo yeo e hwetšagalago go <https://ejfunds.org.za/apply-for-support/>. Tshapedišo ya kgopelo gape e akareditšwe tšhateng yeo e hwetšagalago (ka maleme a mantši) go <https://ejfunds.org.za/apply-for-support/>.

EIJ e tla swara **lenaneo-tlahlo ka kgokagano ya inthanete** bakeng sa bao e tla bago bakgopedi ba ka moso ka **di 15 February 2024 ka 16:00**. Gore o be gona, hle šomiša linki e latelago: <https://zoom.us/j/95800923574>
ID ya Kopano: 958 0092 3574

Ge eba o sa dutše o na le dipotšišo goba o hloka thušo le ge e le efe, hle ikgokaganye le rena go info@ejfunds.org.za goba 078 291 0014.